

## Sechaba sa Molimo se Litoropong



---

### SABATHA MANTSIBOEA

#### Bakeng sa thuto ea Beke ena, Bala:

Tšen. 2:8–11, 3:7–11, 2:12–17, 14:12, 2:18–29, 3:1–6, 3:14–22, Esa. 61:10.

#### Temana ea Khopolo:

“‘Ea nang le litsebe a utloe seo Moea o ae bolellang likereke” (Tšen 3:22).

**H**o tsoa Patamose, Jesu o romela ka Johanne lengolo le nang le melaetsa e supileng ho ea ho sechaba sa hae. Leha melaetsa eo qalong e ne e tobile likereke tsa Asia tsa matsatsing a Johanne, hape e ne e ngoletsoe Bakreste nakong eohle ea nalane. Papiso ea melaetsa ena e bontša hore e latela tlhopho e mekhahlelo e tšeletseng. Molaetsa ka mong o buloa ka hore Jesu o bitsa kereke ka 'ngoe ke lebitso. Karolo ea bobeli e qala ka polelo: “ ‘Ea ....o bolela tseo o re: . . . ’ ” e leng moo Jesu a itlhalosang kerekeng ka 'ngoe ka ho bolela lintlha tse mo hlalolang Khaolong ea 1. Litlhaloso tseo li ne li lokela ho latela litlhoko tse ikhethang tsa kereke ka 'ngoe. Ka hona, Jesu o supa bokhoni ba hae ba ho fihlela mathata maemo a bona a fapakaneng. E be, Jesu o fana ka thoriso ho kereke le keletso ho kereke ea hore ba e tsoe joang bothateng ba eona. Qetellng, molaetsa ka mong o qetella ka boipiletso ba ho utloa Moea le tšepiso ho ba hlolang.

Ha re hlomp Holla melaetsa, re tla bona hore Jesu o ile a khona ho fihlela litlhoko tsa kereke ka 'ngoe, ho sa natsoe maemo. Ka hona, ruri a ka fihlela litlhoko tsa rōna le kajeno.

*\*Ithute thuto ea beke ena ho lokisetsa Sabatha, 18 Pherekhong.*

## Melaetsa ea Kreste ho ea Smirna le Filadelfia

Molaetsa oa bobeli le oa botšelela oa Jesu qalong o ne o supa likereke tsa Smirna le Filadelfia. Likereke tsena tse peli ha li ea ka tsa fumana likhalemelo ho tsoa ho Jesu.

Smirna e ne e le motse o motle le o ruileng empa hape e le khubu ea khumamelo e susumetsoang ea babusi. Litholoana tsa ho hana ho ikobela taelo ena e ka isa moo motho a ka lahleheloang ke maemo a molao le ho ka bolaeloa tumelo ea hae.

**Bala Tšenolo 2:8–11. Ke joang tsela eo Jesu a iponahatsang ho kereke ee e amanang le maemo a kereke? Boemo e ne e le bofe ba kereke? Ke likeletso life tseo Jesu a li fanang ho kereke ka se tlang?**

Molaetsa oa kereke ea Smirna hape o supa kereke ea ka mora nako ea baapostola, ha Bakreste ba ne ba hlirisoa haholo ke 'muso oa Roma. “Matsatsi a leshome” a boleloang ho Tšenolo 2:10 a supa lilemo tse leshome tsa lithloriso tse qalileng ka Diocletian ka A.D. 303 tsa tsoela pele ho fihlela ka A.D. 313, ha Constantine e Moholo a ntša Taelo ea Milan, e neng e fa Bakreste tokoloho ea bolumeli. Kereke ea botšelela eo Jesu a buang ka eona e ne e fumaneha Filadelfia (“lerato la boena”). Motse o ne o lutse khubung ea khoebisano e neng e kopanya likarolo tsohle tsa bochabela le likarolo tsohle tsa bophirimela tsa porofinse. O ile oa theoa e le khubu ea ho thoholetsa puo ea se-Gerike le moetlo sebakeng seo sa Lydia le Phrygia.

**Bala Tšenolo 3:7–13. Ke joang tsela eo Jesu a iponahatsang molaetseng oo e amang le bomeo ba kereke ee? Polelo ea Jesu “U sana le matlanyana” (Tšen. 3:8) e bolela eng ka boemo ba kereke? Ke tšepiso efe eo Jesu a e fanang kerekeng ee?**

Molaetsa oa kereke ena hantle o supa tsosolosong e kholo ea boporosetanta lekholong la bo leshome le metso e robeli le e robong la lilemo. Ruri ka 'nete, ba ile ba fana ka leseli leo ba neng ba na le lona, “u bolokile lentsoe la ka” (Tšen. 3:8). Kereke ea nako ena e ne e khannoa ke takatso ea sebele ea ho isa Evangeli lefatšeng. Ka baka leo, ho ile ha ba le phatloha ho hoholo ha Evangeli ho so kang ho bonoa ha e sa le ho tloha nakong ea Pentekonta.

## Molaetsa oa Krete ho ea Pergame

Pergamose, kapa Pergame, e ne e le khubu ea lihlotšoana tsa khumamelo ea bohetene, ho kenyeletsa le lihlotšoana tse kang bo-Asclepius, molingoana oa ba-Gerike oa pholiso, o neng o bitsoa “mopholosi” oo letšoao la ona e neng e le noha. Batho ba ne ba tla ho tsoa hohle tempeleng ea Asclepius ho tla folisoa. Pergame e ne e na le boemo bo kapele khothaletsong ea khumamelo ea ’musisi, eo joalo ka Smirna, e neng e tlama. Ha ho makatse hore e be tamana e re Bakreste ba Pergame ba phela motseng oo “Satane a ahileng teng” le moo terone ea hae eleng hona teng.

**Bala Tšenolo 2:12–15. Ke joang Jesu a iponahatsang ho kereke ee? Thoholetso ea hae ke efe ka boemo ba semora ba eona?**

---

Ba potapotiloae ke bohetene le litempele tsa teng tse kholo, Bakreste ba Pergame ba ile ba tobana le litoko tse tsoang kantle le ka hare ho kereke. Leha boholo ba bona ba ile ba sala ba tšepahetse, ba bang ba bitsoana ba ba-Nikola, ba buelella bohetene e le ho qoba litlhoriso. Ba amahanngoa le sehlopha sa bokoinihi, se bitsoang ka Balaame, ea ileng a bea khopiso ho ba-Iseraele tseleng ea bona ho ea lefatšeg la pallo (Num. 31:16). Lihlopha tseo peli li ne li buella liketso tsa bohetene e le ho qoba litlhoriso.

**Bala Tšenolo 2:16, 17. Jesu o khothaletsa kereke ho etsa joang e le hore e tle e ba thuse ho ntlafatsa boemo ba bona ba semoea? Ke tšepiso efe eo Jesu a ba fang eona?**

---

Molaetsa oa kereke ea Pergame hape hantle o hlalosa boemo ba kereke ea nako e bileng ka mora A.D. 313. Leha Bokreste bo ile ba hapa ntoea ea bona khahlanong le bohetene, ba bangata ka hara kereke ba qalella ho ineakanya. Leha ba bang ba ile ba sala ba tšepahetse Evangeling, lekholo la bone le la bohloko la lilemo la pakoa ke ho putlama ha semoea le bokoinihi, boo kereke e neng e loantsana le bona—’me ea lahlehelo ke teko ea ho ineakanya.

**Ho bolela eng ho se “latole tumelo” (Tšen. 2:13; sheba hape Tšen. 14:12). E re bolella eng ka qaleho ea tumelo le boikarabello ba rōna bo khethehileng ba ho itšoarella ka eona, leha litšoso tsa lefu kapa, mohlomong ka ho fetisisa, tšoso ea boikhakanyo?**

## Molaetsa oa Kreste ho ea Thiatire

Papisong le metse e meng ea litoropo, Thiatire e ne e se na polotiki kapa moetlo o ithlommeng pele nalaneng ea pele eo re e tsebang kajeno. E ne tsejoa ka khoebisano. E le ho etsa khoebo kapa ho ba le mosebetsi, batho ba ne ba lokela ho ba karolo ea mekhatlo ea khoebo. Litho li ne li lokela ho ea litokofeleng tsa mekhatlo ea khoebo le ho nka karolo litšebeletsong tsa litempele, tseo hangata li neng li kenyeletsa liketso tse hlephileng. Ba neng ba sa kene taba eo ba ne ba nenoa mekhatlong le likotlong tsa moruo. Bakreste toropong ena ba ne ba lokela ho khetha lipakeng tsa ho tsoaka tumelo kapa ho sala ba tšepahetse Evangeling.

**Bala Tšenolo 2:18–29. Jesu o iponahatsa joang ho batho baa (sheba hape Dan. 10:6)? Ke makhabane afe ao Jesu a thoholelitseng kereke ka oona, 'me ke taba efe e nene e e khathatsa?**

---



---



---



---



---

Joalo ka kereke ea Pergame, tšoso ea kereke ea Thiatire e ne e le ho ikhakanya ka tikoloho ea bohetene. Lebitso “Jesebele” le supa mosali oa morena Akabe, ea ileng a isa ba-Iseraele bokoining (1 Marena 16:31–33). Jesu o mo hlalisa e le seotsoa sa semoea. Ba amohelang lithuto tsa hae ba ne ba etsa bohloa ba semoea le eena.

Boemo bo hlalosoang ka hara kereke Thiatire bo supa maemo a kereke ka bophara nakong ea Middle Ages. Kotsi e neng e tobile kereke e ne e sa tsoe kante empa ho tsoa ho ba ipolelang hore ba fuoe matla ke Molimo. Ka nako eona eo, moetlo o ile oa nka sebaka sa Bibe, boprista ba botho le lithako tse khethehileng tsa nka sebaka sa boprista ba Kreste, 'me liketso tsa nkoa e le mokhoa oa ho fumana pholoho. Ba neng ba sa amohela tšusumetso eo e bolileng ea kereke ba tobana le lithoriso le lefu. Ka makholo-kholo a lilemo (sheba Dan. 7:25) Evangeli kaofela ea lahleha.

**Nahana ka mantsoe a Tšenolo 2:25: “ ‘Feela, le 'ne le tiise seo le nang le sona, ke be ke fihle’ ”. Mantsoe ao a bolela eng ho rōna, ka bong le ka bongata? Ke eng re nang le eona ho tsoa ho Jesu eo re ka tšoarellang ho eona?**

---

## Molaetsa oa Krete ho ea Sarda

Sarda e ne e na le nalane e khahlang. Ka nako ea Roma toropo e ne e se e lahlehetsoe ke boleng ba eona. Ha motse oo o ne o ntse o ithaba ka leruo, khanya ea oona e ne e metse nalaneng e fetileng e seng ho se teng ha joale. Motse o ne o hahilo e holima sehlabane se phahameng, 'me ka tsela eo o ne o sa fihlehe ha bonolo. Baahi ba ne ba ikutloa ba bolokehile hoo maraka a motse a neng a lebeloa ka monyebe.

**Bala Tšenolo 3:1–6 'moho le Mattheu 24:42–44 le 1 Ba-Thesalonika 5:1–8. Ke lintho li fe tse tharo tseo Jesu a khothaletsang Bakreste ba Sarda ho li etsa e le pheko ea boemo ba bona ba semoea? Ke joang tlhokomeliso ea Jesu ea ho “lebelo” e amanang le mokhoa oa nalane oa motse?**

---



---



---

Leha Jesu a ela hloko Bakreste ba fokolang fela ka kerekeng ea Sarda e le ba tšepahalang, boholo ba bona bo shoete semoeeng. Kereke ha e qosoe ka sebe se itseng sa semoea kapa bokoinihli (joalo ka ea Pergame le Thiatire), empa ka boroko ba semoea.

Molaetsa kerekeng ea Sarda hantle o supa boemo ba kereke ea baporosetanta ka mora nako ea nchafatso, ha kereke hanyane ka hanyane e ne e thehela litloaelong le khotsofalong ea semoea. Tlasa tšusumetso ea leqhubu le nyolohang la ho beha mabaka le bofatše, ho tsepama mohaung oa Evangeling e phosang le boikitlaetso ho Krete ha tapa, ho fana ka sebaka ho beheng mabaka le likhang tse senang 'moko tsa filosofi. Kereke nakong ena, leha e ne e shebahala e ka ea phela, ka 'nete-'nete e ne e shoete semoeeng.

Lengolo hape le supa melokong eohle ea Bokreste. Ho na le Bakreste bao ka mehle ba buang ka mokhoa o khahlehang ka botšepeli ba bona ho Krete ba nako e fetileng. Ka bomalimabe, bona bao ha ba na letho leo ba ka le arolelanang la maiphihlelo a bonale Krete a ha joale. Bolumeli ba bona bo tloaelehile, ha bona tumelo ea 'nete ea pelo le boikitlaetso ba 'nete Evangeling.

**Re ntse re bolokile kamehla kapele ho rōna 'nete e tiileng ea pholoho ka tumelo ho Krete feela, ke ka litsela li fe tseo re ka reng mesebetsi ea rōna ha e so ka e fumanoa e “phethehile” pela Molimo? Seo se bolela eng, 'me ke joang re mesebetsi ea rōna e ka “phethehang” ka pele ho eena? Sheba Matt. 5:44–48.**

## Bakreste ba Laodicea

Kereke ea ho qetela eo ho buuoang ka eona ke Jesu e ne e fumaneha Laodicea, motse o ruileng haholo o lutseng tseleng e kholo ea khoebisano. O ne o tumile ka lifeme tsa boea, libanka tsa teng (tse neng li tšoere khauta e ngata), le sekolo sa bongaka se neng se hlahisa setlolo sa mahlo. Katleho eo e ile ea tlatsa baahi ka boikhothomoso. Ka bo A.D. 60, ha ho reketla ha lefatše ho timetsa motse oo, baahi ba ile ba hana thuso e tsoang Roma, ba bolela hore ba na le sohle seo ba se hloakang ho ka etsa mosebetsi. Ka ha motse o ne o hloka metsi, o ne o fuoa metsi ka mocha o neng o hlaha mehloling e futhumetseng ea Hierapolis. Kaha e ne e le hole le Laodicea, metsi a ne a ba foofo ha fihla moo.

**Bala Tšenolo 3:14–17 'moho le Hosea 12:8. Etsa papiso ea tse tšoanang lipakeng tsa limelo tsa nalane tsa motse le likhothaletso tsa Kreste tsa kereke ena. Ke joang moea oa ho ikhona oa motse o ileng oa kena Bakreste ba Laodicea?**

---

Jesu ha a ka a khalemela Bakreste ba Laodicea ke lebaka la sebe se itseng, bokhelohi kapa bokoinihi. Bothata ba bona, e ne e le khotsofalo e neng e isa borokong ba semoea. Joalo ka metsi a fihlang motseng, ba ne ba sa bate ba sa chese, empa ba le foofo. Ba ne ba bolela ka hore ke barui ha ba hloke letho; empa, ba ne ba futsanehile, ba le feela, ba bile ba foufetse semoeng sa bona. Kereke ea Laodicea hantle e emetse boemo ba semoea ba kereke ea ho qetela ea nalane ea lefatše lena. Sena se bontšoa ke mantsoe a matla a hokahanang le a Tšenolo 16:15, khokahanong le tokisetso ea tlokotsi ea ho qetela, e bontšang hore kereke ea Laodicea e ne e reretsoe ho ba mohlala oa kereke ea ho qetela. Kereke ea ho qetela e tla phela nakong e thata ea lipolotiki, le bolumeli, le mefereferere ea machaba 'me etla tobana le liqholotso tseo ho so kang ho ba le moloko o tobanang le tsona. Empa, kereke ena ea ikhona 'me e loantsana le boitsibiso ba eona. Tlhokomeliso ea Kreste ho eona bo fihlela hole bohle bao e leng karolo ea kereke ena ea ho qetella.

Jesu o tiisetse ba Laodicea hore oa ba rata le hore a ke ke a ba lahla (Tšen. 3:19). O qetella boipiletso ba hae ka ho ipapisa le morati oa Sefela sa lifela 5:2–6, a eme monyako le ho kokota le ho kopa hore a buleloe a kene (Tšen. 3:20). E mong le e mong ea ea bulang monyako le ho lumella hore a kene o tšepisoa ho lula lijong le eena. Memo ena ha ea lokela ho feta mang kapa mang.

**Bala Tšenolo 3:18–22. Ke keletso efe eo Jesu a ileng a e fa ba Laodicea? Khauta, seaparo se se soeu, le setlolo sa mahlo e emetse eng (sheba 1 Pet. 1:7; Esa. 61:10; Ba-Efe. 1:17, 18)? Tsee tsohle li reng ho rōna, re le Masala ao re iponang re le kereke ea Laodicea?**

### **Khopolo e Eketsehileng:**

Bala Ellen G. White, “Tšenolo,” pp. 578–592, in *The Acts of the Apostles*. Melaetsa e supileng ho likereke e bontša ho theoaha semoeeng likerekeng tse supileng. Kereke ea Efese e ne e ntse e tšepahala, leha e ne e lahlehetsoe ke larato la pele. Kereke ea Smirna, Pergame, le Filadelfia li ne li ntse li tšepahala; e ne e le feela palo e fokolang ea batho ba satalalitseng melala ba neng ba sa tšepahale. Thiatire e ne e le kereke e arohaneng ka likarolo tsa eona tse peli botšepheing ba eona ho Krete. Kereke ea Sarda e ne e maemong a hloabaetsang haholo. Bongata kerekeng ena bo ne bo le hole le tsela ea evangeli, ha Masala a ne a emetse ba fokolang ba tšepahalang. Kereke ea Laodicea e ne e le boemong boo ho seng letho le letle le ka boleloang ka eona.

Ho qetelleng molaetsa ka mong, Jesu o etsa litšepiso ho bao ba amohelang keletso ea hae. E mong a ka ela hloko, leha hole joalo, hore ’moho le ho theoaha semoeeng likerekeng, ho na le kholo e lekanang ho litšepiso tse fanoang. Ho qala ka Efese, e fuoang feela tšepiso e le ’ngoe, ha kereke ka ’ngoe e latela ho thoheng semoeeng, ka ’ngoe kereke e amohela litšepiso tse ngata ho feta e tšileng pele eona. Qetellong, kereke ea Laodicea, leha e filoe tšepiso e le ’ngoe feela, e fumana e fetisang: ho lula teroneng le Jesu (Tšen. 3:21).

### **Lipotso tsa Puisano:**

**1. Ke joang ho eketseha hona ha litšepiso, ’moho le ho theoaha semoeeng ha likereke, ho bontšang polelo e reng: ha sebe se eketseha, mohau o ngatfala ka ho fetisisa (Ba-Roma 5:20)? Nahana ka seo leseling la polelo ena, “kereke, leha e ka bonahala e fokola e le liphoso, ke sona feela se sebelisoa lefatšeng seo kreste a fetisang litšepiso tsa hae ka sona. O ntse a e talimile ka hloko, ’me o ntse a e matlafatsa ka Moea oa hae o halalelang.”—Ellen G. White, *Selected Messages*, book 2, p. 396.**

**2. Hangata Bakreste ba re ho thata ho ba Mokreste litoropong tse kholo, lifemeng, le khoebong. Re ka ithuta eng tabeng ea hore le litoropong tse kholo tsa Asia ho ne ho ntse ho na le Bakreste ba tšepahalang Evangeling le ho thekesele hara liqholotso tsohle tsa tikeloho ea bohetene?**

**Nahana ka Bakreste bao ba Asia ka leseli la thapelo ea Jesu ho Johanne 17:15–19. Ke joang taba ea ho ba lefatšeng empa re se ba lefatše e amang Bakreste kajeno, haholo-holo ba ahileng litoropong tse kholo?**

**3. Ke joang re le Masala, re ka utloang betere mantsoe ao re a fuoang molaetseng oa ba Laodicea?**